



Siamsin Bulletin

VOL XXV ISSUE NO. 2

PUBLISHED BY: PUBLICITY & MEDIA, SSPP JHQ DELHI

APRIL 26, 2020

BIBLE CHANG TEEL

Galatiate 6:9-10

Huchi'n, thil hoih hih chimtak kei ni; i lungkiak kei leh a hun tak ah i at ngei ding ahi ngal a.

Huchi'n, lemtang hun i neihdan bang zel in mi tengtung ah thil hoih hih ni, ginna innkuanpihte lak a omte tung ah hikhol diak hen.

DELHI YOUNG PAITE ASSOCIATION A KIPAN

DYPA COVID-19 HELPLINE

Tu Lockdown sung a suansam thei dinmun leh haksatna tuak i omleh hiai a nuai a Helpline number kipia ah chiklaipeuh in thuzak ni. Relief na dan in mimal khat ah huhna Rs 1000/- tan leng muhtheih ding hi.

DYPA HELPLINE NUMBERS:

DELHI SOUTH AREA:

Juan Khuptong – 9899226337

NORTH DELHI AREA:

Joel P Ngaihte – 9971391243

DELHI WEST AREA:

Thangkhansiam Naulak – 9871337161

DYPA JHQ:

Hau Tunglut – 9953552369

Lamlun Munluah – 9818431467

Jh Ginmung - 8826409975

SSPP Delhi Advisory

COVID-19 hiipi ziak in i omna Delhi khopi tel in leitung pumpi in buaina nasatak i tuak hi. Hiai hiipi lauhuitak leh baihlamtak a kilohsawntheih ahihman in kuapeuh pilvang ki sam hi.

Hiai hiipi in i omna Delhi khopi leng nasatak a hon nawkkhak ziak in hindan ngeina nasatak in nawngkaisak hi. Siamsinna innte (schools & colleges) khak in om a, sumbuk (dawr) khenkhat leng khak in om hi. Tuabang ahihman in, hiai hiipi a pan kivenna leh lockdown sung hun zatdan lam toh kisai a phatuamzaw ding a hihkhakleh chih lametna in theituak leh zuihtuak khenkhat taklang ni:

1. Kholak pawt tamlouh phot hoih. Ahitheitan a kivehtuahlouh/kipawttuahlouh phot a, mahni inn a kikhum a sungkuante toh hun zatkhawm ding ahi. Covid-19 toh kisai a hih ding leh zuih ding kigente nguntak a zuih a hoih.
2. Damtheihna kepbit poimoh a, neek-le-dawn a pilvan a taksa sawizoina (mahni inn ah) hih theih dandan a hih a hoih.
3. School leh High School kailaite online tungtawn a class lakpih a homework/assignment leng online tungtawn a piak a om ahihman un nu-le-pate'n/local guardian-te'n etkaipih a zohpih ding in leng i kingen hi.
4. College kailaite'n leng i siamsinna a i sinlaite mah etna hun a zang a, i laizilna toh kisai a hih ding tuamtuam i neihte hihna hun a zang a, ahihtheih liaileh Assignment piak a omte a hun a zoh ding.
5. I siamsinna a i sinlaite kia leng hilou, maban a sepna zonna hiam ahih keileh kalsang zawsem suanna di'a sinna nei utte a ding in leng hiai hun lemtang a mawkmai a zangbei mai lou a, competitive exams/entrance exams a phatuamthei dingte (maths, reasoning, English Grammar leh a dangdang) kisinna hun a zat a hoih.
6. Kuapeuh in TV leh Mobile khawng kia a hun beisak mailou a, sinlai naupangte'n i sinlaite mah etna hun a zang ni. Innkuante kithuakhawmna hun leh Pathian lam a kisinsakna, Bible simkhawmna leh thumkhawmna hunte a zang ding in i ki hasuan hi.

Delhi khopi a om Siamsinpawlpi member-te (students) hiai lockdown ziak a haksatna (nek-le-tak leh adangdang) tuak i omleh SSPP JHQ Delhi heutute khatpeuh thuzak theih gige ding.

Toupa'n i vek un hon ompih in hon vualzawl chiat henla, damna-hatna i poimoh bangzel un honpe zel hen!

Editorial

Covid-19 panpihna piakdan

Manipur CM Pu Biren' panlakna ziak leh thusiamna ziak in Manipur State mi mundang a nektak zong leh siamsin a omkhiate tulai buaina ziak a Rs 2000 chiat panpihna piak ding, chih thu hon puankhiak a kipan in i ngaihven kheukhou ua, tampitak inleng i muta ua, maban ah leng a saikha khempeuh in mukim vek ding bang hi.

Hichibang a Manipur Government in pan a laknate kipahpih huai i sa petmah a, a diak a nektak zong a khopi tuamtuum a omte'n hichibang panpihnate kipoimoh diak hi. Ahi a, tua i gennop zaw panpihna i ngahte hilou in i kipiakdan uh ahi.

Lamka lam ah tulai in hun-awl hau, thadah om maimai theilou leh mi' thilhihdan liaisiah etdan tuam zaw deuh a ana en a, soiselna ding zong teitei khenkhat ziak in panpihna piakna leh hawmkhiakna toh kisai ah Relief committee kiphutkheten' nawngkaina tampitak tuak uh hidan in theihtheih hi.

Hichi'n genleng, eilawi in bel Allu ser khatlel i piakkhiak khakleh khovel a panpihna pekhe tampente' lak a khat bang mai in i social media-te uah i takkhe pahpah ua, zumhuai lawdeuh hilou hiam?

Banah, mi kuahiam in a piakkhawmte uh hawmkhiakna nasan ah minhoih delh hile uh kilawm pawlkhat om hi. Tulai paidan a hihleh panpihna petu leh a hawmkhetu kibang chih om khollou hi. A nihtuak ua minhoih leh minthan hong uttuak chiang un panpihna ana ngahtu' aa ding in zumhuai lehlam khathei hi.

Hichi'n genchiang zaw deuhleng, panpihna i pia a, thilpiak i hawmkhe kha ahi zong in, social media ah kiphoulak sese nawnkei maileng bang a chi dia? chih ngaihndan kizuaknuam i hi. Chiamteh teitei ngai, i chiamteh keileh jail baang zutngai ding a hihlebel chiamteh a poi hetkei a, huchilou liaisiah zaw i taklat zengzung in phattuumna a nei tawm lawkha ding, chih lauhuai zaw hi.

Covid 19 in i gam a buaina hon tut nung lockdown khakhat hoihtak hipan a, maban ah bangtan daihlai ding hiam chih kitheilou a hihman in ei phatuam ngaitak a panla i kichihlai a social media a kuahiam' kiphoulakna di'a a limlak a telkhak ding lauman a ann ngawl a sih utzaw i mi-le-sate' lak ah a omkha ding chih bang leng thil lauhuaipi ahi.

Khopi a khosa ngam chiang in bel thukhat ah gum mahmahna khat kinei chiat sam mahleh, hichibang hun haksatak i tuah hial chiang in bel kuahiam mimal leh pawlpi' kipahtawina ding lel a i limlak hon zatsak khak ding uh lau omkha thei hi hang, chihman ahi.

I panpihna piakdan uh enthak ni.





Students Corner

Delhi University toh kisai:

Hiai a nuai a link tungtawn in Delhi University nuai a Under Graduate Online Semester Examination form fill up theih ding hi. Hiai online exam form a hihleh maban a May-June Semester Examination a ding ahi.

examportal.duresult.in/StudentPortal/Login.aspx

IGNOU toh kisai:

Ignou nuai a UG leh PG 2020(June) term-end exam(TEE)a ding Assignment submit hun suan(extend) in om nawn hi. Thusuak masa ah Assignment Submit last date April 30 hi mahleh Lockdown Extend a hihziak in May 31 tan a di'a suksau a om ahi.

NCERT E-BOOK download theih:

Hiai a nuai a link a lut in NCERT in a bawl class 1 a kipan class 12 tante' textbook chikim pdf in download theih ding hi.

ncert.nic.in/ebooks.html

Banah, hiai a nuai a link kipia tungtawn in NCERT Alternative Calendar ettheih ding hi;

ciet.nic.in/upload/AACprimary-eng.pdf

AICTE a kipan thupuan:

All India Council for Technical Education(AICTE) in 15th April,2020 a thupuan a bawlina ah College student-te' tuition fee siikna bawllou ding in College thuneitute' kiang ah ngetna bawl hi. Thuchian kimzaw hiai a nuai a link kipia a lut in simtheih ding hi;

www.thehindu.com/news/national/coronavirus-students-need-not-pay-college-fees-till-lockdown-is-lifted-says-aicte/article31350558.ece

SEPNA A KIPAN KHAWLTA

Pu **Kiamlo Hangzo**, tulel a SSPP JHQ, Delhi Advisory Board member muanhwaitak leng Indian Defence Account Service a kum 30 a sep nung in a paisa February 29, 2020 in ana khawlta(retire-ta) hi. Aman IDAS a a sepma in State Bank of India ah leng kum 7 ana sem khaman hi.

Chidamtak a semthei a, a pension tanpha a chidam, thahat leh lungsim hattak a omlai a hihman in i kipaphih diak mahmah hi.

I pawlpi' aa ding a khuam poimoh mahmahte' lak a khat a hihdan taklang kawm in a sepna a kipan a khawltak kipaphihthu hiai i Bulletin deihtohhtak tungtawn un in khak hihen la, maban ah leng i pawlpi leh i mi-le-sate' aa di'a a hihtheihna, pilna leh siamnate kisit hetlou a hong kizangtou lai ding inleng i ngen a, huai ding inleng i lameng ngal ahi.





Paite General Knowledge

Pu Tonsing Christian Tiankham (TC Tiankham), BA, IAS

Pu TC Tiankham a hihleh 1913 kum in Khawdungsei, Mizoram ah piang a, 17th August, 1996 in si hi.

Aman 1944 in Calcutta University nuai a om Silchar Gurucharan College a kipan BA zou hi.

Sepna lam ah Circle Officer 1947 in sem a, himahleh hiai post sawt semlou hi. 1947 kum in Manipur Independent gam dan a om in Constitution kibawl a, hiai Constitution bawltute' lak ah Pu TC Tiankham leng telban hi. Huai Constitution dungjui in Interim Ministry election omlou in 1947 in guan in om a, huai hun ah Minister hihna piak ahi.

1948 in election om a, hiai hun in Pu TC Tiankham tuh Manipur Assembly Speaker dinmun letsak in om hi. Non-Naga mite' lak a Manipur Assembly Speaker masapen leng ahi.

Manipur in 1949 kum a Indian Union a lut di'a Marger Agreement a bawl ziak in Assembly phiat in om hi.

State Service nuai ah Sub-Deputy Collector/Extra Assistant Commissioner dan in 1950 kum in lut a, SDO bang a leng kum tamlou a sep khit in 1969 in Manipur East District & Ukhrul DC in pang hi.

Mi ginom, chitak leh kuhkal a hihdan a sihnung tanpha a gen mangmoh in om a, banah, i mi masa uh tampite' lak ah chituamna mahmah khat nei hi. Huai ahihleh bangchituk in gingtuloute leh namdang toh kihetkha in nna semkha tham mahleh, a minam leh a gingtu hihna kisaktheihpih mahmah leh zumpih mailou a hihdan a min mahmah ah "TONSING CHRISTIAN" chih a tuangsak viuveuna a kipan in theihtheih mai hi.



Siamsinna kichi khovel khektheihna dia galvan hoihpen ahi.

—Nelson Mandela

Na aw sangsak ke'nla, na ngaihdan puahpha zaw in.

—Desmond Tutu

Leitung in michih poimoh saktuahna diing nei a, himahleh michih duhgawlna saktuahna diing a neikei.

—Mahatma Gandhi

Bangmah theilou i hihdan kitheihna ah theihna dik a om.

—Socrates

Nungzui hoih hi theilou tuh makai hoih a hi theikei.

—Aristotle

Nipi lai a kaikhawmpa tuh tapa pil ahi; himahleh buhlaak lai a ihmupa bel zumna tun tapa ahi.

—Paunaakte 10:5




Fun Facts

- Khovel a media lianpen pawl a kigen Caable News Network(CNN) in April 18 in Chicago a 'Gilead Company' in Covid-19 damdawi ding bawlkheta, chi in puang hi. A damdawi min a hihleh "Remdesivir" chih min piak hi a, US gamsung ah naktak in kizangta chih ahi. India a hong puaklut pah uh lamem hang. Hiai damdawi pen China kiang a zuak hilou ding chihthu White House a kipan puan in om, chih zawlnei takloute a kipan zak in om.
- Tulel a khovel in a buaipih Coronavirus/Covid 19 i chih in min chituamtuak nih nei a, huaite a natna(disease) min leh a hik(virus) min ahi. A natna min – Covid-19 ahi a, a hik min – SARS-CoV-2 kichi hi.
- Ni 11 February,2020 in WHO in Coronavirus pen "COVID-19" min piak in ompan hi.
- India khutsuak Covid-19 testing kits mukhetu Mybab Discovery Team-te makaihtu ahiehleh virologist Dr. Minal Dakhave Bhosale ahi.
- Covid natna bangchituk in lauhuai mahleh a damdawi hoihpen bel khut silsiang gige a, kholai leh mipi' lak a om chiang a muktuumna(facemask) zat in dalzou mahmah, kichi hi.
- Social distancing kichi pen mi khenkhat in 'social distant singh' chi in gelhzel uh.
- Coronavirus ziak in India gamsung mun tampitak ah NE mite'n vaite a kipan deidanna leh muhsitna banah bawlsiatna tuak zeuhzeuh chihthu tulai in kigen nak mahmah hi.
- Tulaitak in Delhi ah eimite a tamzaw in Tullou TV leh Phualva Times in a khahkhiak zel Lamka a kipan thugentu minthang taktakte a kipan live streaming sermon ngaihkhikna nei gige ua, a ngaikhe man tuanlou a 'work from home' tangkhate'n engthei petmah uh, chihthu leng zak ahi.
- Covid-19 ziak a i gamsung pumpi in lockdown i neihsung un a tamthei lam in i tangtawn mun ding gelfel leng chih i kideihsak thukhak a hih banah, thugentu tampi'n leng gen veu uhi.

Tom and Jerry Director-pu si

Cartoon network lak a di'a leng a neu a lian in I theihphak chiat un Tom and Jerry series director-pu Gene Deitch in damlouna ziak in 16th April, 2020 in a tenna mun Prague khopi ah mualliam hi.

Chimthawina hoihtak hon bawlsak a hihman in khovel in mi manpha mahmah khat mansuah I hi chileng I genkhial kholkei ding. Tom and Jerry tv series thak mu nawnlou phot ding hileng kilawm maw?



Editorial Board

Editor:

M. Liankhsiam

Assistant Editor:

L. Kaichinpau

Joint Editors:

Thanglianmang Vualzong

Ginkhsiam Dousel

Consultants:

Siampu Thomte

Minsang Guite

Office:

Siamsinpawlpi JHQ/Delhi

N-258, Sector 8, R.K. Puram,

New Delhi - 110022